




Il podest tar ils juniors arma pneumatica: Gianna Tomaschett, Selina Lötscher e Valentina Caluori (da san.).

FOTOS G. N. STGIER



Adina da buna luna: Leandro Petschen.

Quatter novs campions grischuns

Tir: Campionadi chantunal 10 meters

DA GION NUTEGN STGIER / ANR

■ L'occurrènz a Domat è ida a fin cun duas surpraisas. Gudagnà medaglias han las tiraduras sursilvanas bain, dentant na stadas il pli sum il podest. In da quels che ha fatg la medaglia d'aur è lura stà Elmar Fallet, da preschent in dals megliers tiradurs da pistola da la Svizra. La halla da sport Vial a Domat è stada lieu d'acziun dals Campionadis grischuns da tir sin la distanza da 10 meters. Tragt è vegnì cun l'arma pneumatica e cun la pistola d'aria. Vegnì sajettà è a Domat en il medem modus sco tar ils Campionadis mundials ubain tar ils Gieus olimpics. Cun excepziun dals juniors che han tratg cun la pistola pneumatica, els che han sajettà ina qualificaziun cun 40 culps, è en las autras trais categorias vegnì sajettà mingamai 60 culps per sa qualifitgar per il cumbat final. En quel han lura ils otg megliers tiradurs/as cumbattì per las medaglias.

Mo il terz plaz per Elena Tomaschett

L'occurrènz singula cun l'arma pneumatica tar l'elita ha gudagnà Carina Caluori (Razén). Ella aveva già gudagnà la qualificaziun ed uschia partida en il final sco favorita. La medaglia d'argient ha lura gudagnà Anna Laura Klucker (Tumein) cun sajettar cunzunt vers la fin dal final fitg precis. Be il terz plaz ha obtegnì Elena Tomaschett (Rabius), ella ch'aveva gügent defendì ses titel gudagnà avant in onn a Trun. La victoria da Caluori n'è segir nagina surpraisa cun ella adina da novamain esser sin il podest tar l'elita. La concurrènz da grupaps ha gudagnà Domat I avant Trun e Domat II.

Strusch in che quintava cun Selina Lötscher

Per la pli gronda surpraisa ha segir procurà Selina Lötscher (Serneus) cun l'arma pneumatica en la categoria juniors. Ella ha tratg in final da vaglia e fatg per in pau daplis puncts che la gronda favorita Valentina Caluori (Razén). Terza è vegnida Gianna Tomaschett (Trun) ed uschia cumpletta il podest. Mantgantà da cuntascher in plaz

da podest cun il 4. plaz ha lura Chris Wolf (Trun). Disditg en il final ha bain Annina Tomaschett (Trun), ella ch'era quel di in pau nervusa e malsegira. Landquart I, avant Trun e Landquart II, quai è il podest tar las gruppas en quella categoria.

Plaschair tar Tim Wolf

Ina classa per sazez è lura stà Elmar Fallet (Müstair), el che ha gudagnà l'occurrènz da pistola en la categoria elita. Il pur da Müstair ha entschet main bain il final e vers la fin da quel laschà nagina schanza als concurrents. Cun ina quietezza e cun ina rutina ha el sajettà ils davos culps e mussà pertge ch'el è vegnì intginas giadas tiradur grischun da l'onn. Argient ha fatg Robert Demonti (Tremas) e bronz è i a Ramon Cramer (Zezras). La categoria dals juniors cun la pistola n'ha forsà betg gudagnà il grond favorit Nando Flutsch (St. Antöncien), mabain Tim Wolf (Conters). El è sa mussà ventiraivel suenter ses success e da quella victoria han er ses concurrents gi plaschair. Tar las grupaps èn quels dal Partenz stadas las fermas.



Tragt è vegnì en la halla da sport Vial a Domat.



Organisaziun perfetga dals tiradurs da Domat e conturn.



Cuntent senza medaglia: Andri Tomaschett.



Nagina medaglia per Annina Tomaschett.



Trais dunnas sin il podest tar la categoria arma pneumatica elita: Anna Laura Klucker, Carina Caluori ed Elena Tomaschett (da san.).



Treis sursilvans: Tino Coccia, Giulio Blumenthal e Chiara Weishaupt (da san.).